

Atuisoqarnermut Unammilleqatigiinnermullu Aqutsisoqarfiup sulinera pillugu Namminersorlutik Oqartussat nalunaarutaat nr. 5, 10. marts 2016-imeersoq

Unammilleqatigiinneq pillugu Inatsisartut inatsisaanni nr. 1, 15. maj 2014-imeersumi § 26, imm. 3 naapertorlugu aalajangersarneqarpoq:

Kapitali 1

Atuisoqarnermut Unammilleqatigiinnermullu Aqutsisoqarfiup sulinera

§ 1. Atuisoqarnermut Unammilleqatigiinnermullu Aqutsisoqarfik Unammilleqatigiinnermut Ataatsimiititaliamut allatsitut atuuppoq unammilleqatigiinnermullu inatsisip aqunneqarnerani Naalakkersuisunut attuumassuteqarani.

Imm. 2. Atuisoqarnermut Unammilleqatigiinnermullu Aqutsisoqarfik pisortamit Atuisoqarnermut Unammilleqatigiinnermullu Aqutsisoqarfiup sulineranut pingaarnertut akisussaasumit aqunneqarpoq. Taassuma peqannginnerani tullissortaasoq qaninneq paarlatsitut aqutsisuusaaq.

Kapitali 2

Piginnaatitaaffiit

§ 2. Atuisoqarnermut Unammilleqatigiinnermullu Aqutsisoqarfiup suliassat Unammilleqatigiinnermut Ataatsimiititaliap suleriaasia aamma ingerlatsinera pillugu Namminersorlutik Oqartussat nalunaarutaanni §§ 4-6 malillugit Unammilleqatigiinnermut Ataatsimiititaliap suliarisassai aalajangiiffigisassaalu imaluunniit Atuisoqarnermut Unammilleqatigiinnermullu Aqutsisoqarfiup Unammilleqatigiinnermut Ataatsimiititaliamut saqqummiunneqartariaqartutut isigisai Unammilleqatigiinnermut Ataatsimiititaliamut saqqummiutissavai.

Imm. 2. Malittarisassanut missingiut Unammilleqatigiinnermut Ataatsimiititaliap unammilleqatigiinnermut inatsit naapertorlugu aalajangiiffigisassaa Atuisoqarnermut Unammilleqatigiinnermullu Aqutsisoqarfiup Unammilleqatigiinnermut Ataatsimiititaliamut saqqummiutissavaa.

Imm. 3. Unammilleqatigiinnermut Ataatsimiititaliap aalajangiiffigisai Atuisoqarnermut Unammilleqatigiinnermullu Aqutsisoqarfiup suliarissavai ulluinnarnilu unammilleqatigiinnermut inatsimmik aqutsineq pillugu ataatsimiititaliaq ilisimatittassallugu.

§ 3. Atuisoqarnermut Unammilleqatigiinnermullu Aqutsisoqarfiup Unammilleqatigiinnermut Ataatsimiititaliaq sinnerlugu suliassat § 2, imm. 1-imi 2-milu ilaatinneqanngitsut, Unammilleqatigiinnermut Ataatsimiititaliap suleriaasia inassuteqaataalu naapertorlugit aalajangiiffigissavai. Aamma Atuisoqarnermut Unammilleqatigiinnermullu Aqutsisoqarfiup Unammilleqatigiinnermut Ataatsimiititaliaq sinnerlugu suliassat § 2, imm. 1-imi 2-milu ilaatinneqartut piareersarneqarnissaannut atugassat aalajangiiffigissavai.

Imm. 2. Tamatuma saniatigut Atuisoqarnermut Unammilleqatigiinnermullu Aqutsisoqarfiup pisortaata Unammilleqatigiinnermut Ataatsimiititaliaq peqatigalugu suliassat ataatsimiititaliap ataatsimiinnissaanut utaqqisinneqarsinnaanngitsut aalajangiiffigissavai.

Imm. 3. Atuisoqarnermut Unammilleqatigiinnermullu Aqutsisoqarfiup imm. 1 aamma 2 malillugit aalajangiiffigisai pillugit nalunaarut Atuisoqarnermut Unammilleqatigiinnermullu Aqutsisoqarfiup pisortaata Unammilleqatigiinnermut Ataatsimiititaliap tullissaani ataatsimiinnerani saqqummiutissavaa.

§ 4. Atuisoqarnermut Unammilleqatigiinnermullu Aqutsisoqarfiuptamatununga atatillugu unammilleqatigiinnermut inatsisip aqunneqarnera aamma aqutsisoqarfiup sulinera pillugit paasissutissat kiisalu unammilleqatigiinnermi pissutsinut tunngatillugu nalinginnaasumik nassuiaatit allat tamanut saqqummiussinnaavai.

§ 5. Atuisoqarnermut Unammilleqatigiinnermullu Aqutsisoqarfiup pisortaata aalajangissavaa, unammilleqatigiinnermut inatsisip unioqqutinneqarneranut unnerluusummik qaqitsinissaq siunertaralugu unammilleqatigiinnermut inatsimmi § 38 naapertorlugu akileeqqusissutissap annertussusissaanut imaluunniit allatut pineqaatissiisoqarnissaanik inassuteqaatitalerlugu unnerluussisussaataasunut saaffiginnittoqassanersoq.

Imm. 2. Atuisoqarnermut Unammilleqatigiinnermullu Aqutsisoqarfiup pisortaata aalajangissavaa, unammilleqatigiinnermut inatsimmi § 37 naapertorlugu suliffeqarfiit ullut tamaasa imaluunniit sapaatip akunneri tamaasa pinngitsaaliissummik akiliisinneqartassanersut

Kapitali 3

Aalajangiinerit

§ 6. Atuisoqarnermut Unammilleqatigiinnermullu Aqutsisoqarfiup aalajangiiffigisai allaganngorlugit nalunaarutigineqassapput, imarissavaalu pissutsit isummallu aalajangiinnermut aalajangiisuusimasut.

Imm. 2. Aalajangiinerit Kalaallit Nunaanni Eqqartuussivimmut suliassanngortinneqarsinnaasut Kalaallit Nunaanni Eqqartuussivimmi suliassanngortinneqarnissaannut ilitsersuummik ilaqartinneqassapput naammagittaalliorsinnaanermut ilitsersuutitalerlugit, tassuuna nalunaarlugit naammagittaalliortarfik naammagittaalliussagaannilu qanoq iliortariaqartoq immaqalu aamma ullut qassit qaangiutsinnagit naammagittaalliortoqartariaqartoq.

Kapitali 4

Nalunaarutit apeqquteqaatillu

§ 7. Unammilleqatigiinnermut inatsimmi § 2, § 8, § 9, § 11, § 12, § 13 aamma § 14 naapertorlugit nalunaarutit apeqquteqaatillu Atuisoqarnermut Unammilleqatigiinnermullu Aqutsisoqarfimmut tunniunneqassapput.

Kapitali 5

Paasissutissat

§ 8. Atuisoqarnermut Unammilleqatigiinnermullu Aqutsisoqarfik Unammilleqatigiinnermut Ataatsimiititaliaq sinnerlugu paasissutissanik tamanik piumasaqarsinnaavoq, taakkununga ilanngullugit naatsorsuutit, naatsorsuutitut atortussat, allattuiffiit assilineri, niuernermi pappiaqqat allat aamma nalunaarsuutit elektroniskimik toqqortarinqartut sulineri pisariaqartutut isigineqartut imaluunniit pissutsit inatsisartut inatsisaani aalajangersakkanut ilaanersut aalajangiiffigineqarnissaannut pisariaqartutut isigineqartut, tak. unammilleqatigiinnermut inatsimmi § 30.

Kapitali 6

Nipangiussisussaataaneq

§ 9. Atuisoqarnermut Unammilleqatigiinnermullu Aqutsisoqarfimmi sulisut pisortat ingerlatsineranni suliassat suliarineqartarnerat pillugu inatsisartut inatsisaanni nipangiussisussaataaneq pillugu malittarisassat malillugit nipangiussisimasussaataapput.

Kapitali 7

Atortuulersitsineq

§ 10. Nalunaarut manna atuutilissaaq ulloq 1. aprili 2016.

Namminersorlutik Oqartussat, ulloq 10. marts 2016


Vittus Qujaukitsoq

/


Jørn Skov Nielsen